

自序

太初沕穆元黃剖判乾藏坤顯萬物化生故老子成道於母腹玉清神姥實誕元始摩利支天爰產九皇謚母爲日中孝弟王母以大洞玉章雲篆授許旌陽上元夫人爲上古天皇之姥西王母傳道於漢武帝苒君必招與偕魏夫人授黃庭內景經於楊羲女真降者十有五人其他真誥墉城所載真靈位業所書不可悉數蓋大道不分男女而女秉坤體純陰之中至陽生焉則女子之修道成真也又何疑乎余重編西泠仙詠旣列男仙百人復輯女仙得六十人案頭適有女弟蘭雲舊刊孫不二元君所定西王母女修正宗及李泥丸女宗雙修寶箴又值許君石華以回

西泠仙詠卷三

序

一

春子三寶心鏡見貽回春子呂祖也後有西池度楫一卷爲王母小女玉卮夫人吳采鸞崔少玄樊雲翹唐廣真周圓靜孫清靜七真之書及坤訣一卷其言多男真所未及維摩丈室中舍利弗不能不見屈於散花天女矣特囿於西湖一隅其蹤跡無涉者未能闡入惟女真成道皆具苦功其所受皆有真訣其所傳皆有至言嘗與摩鉢約於道藏中輯女真嘉言懿訓彙爲一書如華陽洞天含真易遷兩宮趙素臺韓太華寶瓊英輩八十餘人片言緒綸皆可大顯於世他日者懷仙閣成潔一室以待羣真之降知青鸞彩鳳必有翩然而來下者羣仙高會亦瑤池光碧後一重公案也某學道未成采真有志奉飛祖於邗上禮曇陽

於婁東晤騰空於夢游寶羅郁之丹訣道姥獬臨神姑鶴
降蘭雲篤宗盟之誼則子晉之觀香也摩鉢尋玉局之盟
則義和之鬱嬪也停雲靈芸之懺悔則阿難之摩登曼倩
之宛若也香輪散花宛卿若卿之皈依則貞白之錢妙真
杜契之孫寒華司馬子微之謝自然焦真靜也嗟乎蜉蝣
身世祇有匆匆螻蟻功名無非擾擾男旣牽於世網女亦
墮於塵緣寃親因果着甚來由恩愛牽纏都非究竟不明
慧炬誰尋暗室之燈不示真筌孰識迷津之楫爰蒐香苑
並證靈壇以六十輩之蘭熏玉潔懺千百劫之孽海情天
庶幾芙蓉城闕益增玉女之名桐柏宮庭更入金仙之界

云爾

西泠仙詠卷三 序

二

道光甲午六月圓嶠真逸序於雪瀑雲松館

族兄願道先生年二十爲才子三十爲名士四十爲循吏
五十爲儒者生平著作若詩文內外集秣陵集西冷五集
華胥七編西溪漁話道苑卮言自天文地理至蟲魚草木
巨細兼賅本末畢貫五十以後以禮去官又抱西河之戚
不復出山潛心歸道又得佳耦摩鉢夫人以爲之助雖羈
棲塵俗奔走江湖未嘗少間飛祖謂當膺道脈淵源之寄
小良師亦謂闡揚道要非君莫任蓋世儒多不信道君獨
企儒宗而探道要故其汲引儒林爲多仙詠爲西冷五集
之一女仙一門則閨詠之外兼多補遺湖山之美人物之
盛花月之豔烟霞之幽空靈曠逸蔑以加茲非前生從桂
宮玉局來未易臻此義未嘗學問不解聲詩而於兄之居
心行事道力淺深則旣見而知之矣茲集旣成塵世應無
遺憾所願從此懺除結習乃至無有語言文字煉神還虛
出無色界天庶不負前世夙根今生苦行云爾

同門族女弟羲謹敘

君前生玉局修書耶吾不知也吾前生與君同玉局校籍耶吾不知也君作詩萬首盡付棗梨吾意存數十篇可也君刊文十六卷吾意存數篇可也河渠當議食人之食忠其事也海運鹽筴不當議肉食者謀之越俎也賈讓耶邱濬耶桓寬耶劉晏耶吾不得而知也茲卷因仙詠而及女仙大半取之閨詠皆仙耶修仙有三品天仙水仙地仙也仙有五等天仙神仙地仙人仙鬼仙也將相無種神仙亦無種人者仙之種也人仙世尤多抱仙之質處仙之境在聖不增在凡不減而氣質所拘物欲所蔽甘於墮落而不知悔是可悲矣男既有之女亦何獨不然心澈曰名士牢愁美人幽怨皆非究竟不如學道旨哉斯言迷津之智楫

西泠仙詠卷三

敘

四

暗室之慧鏡矣久謝子墨不辭綴以數言以爲天下女子有志學道者勸

摩鉢敘於妙香天室

西泠仙詠卷三 女仙

目錄

山中詠越處女

江上詠武陵娘子

妙庭觀詠董雙成

江上詠樊雲翹

葛嶺詠鮑姑

稽留峯詠許遠游妻

仙姥墩詠裴仙姥

江上詠嚴李佗

吳山詠孫寒華

西泠仙詠卷三 目錄

杭州詠陶科斗許娥皇道育瓊輝

龍華寺詠傅大士妻

飛來峯禮隋神尼劉智仙舍利塔

江上詠謝自然

江上詠焦靜真

杭州詠夏山姑

靈隱詠顏待月

江上詠吳仁璧女

湖嶺詠黃靈微

杭州詠王奉仙

水雲亭詠周瑤英

廣陵侯廟詠陸氏三女

此君堂詠西湖水仙

臯亭山詠撒沙夫人

前洋街詠玉真娘子

酒肆詠烏衣女子

映壁菴詠唐廣真

梅莊詠武元照

神仙宮詠魏無瑕

煥彩樓詠孫不二

梯雲樓詠徐元娘

韓蘄王池詠徐君寶妻

西泠仙詠卷三

目錄

城西詠織登科記女子

長春菴詠蔡冲靜

紫陽菴詠王守素

南山第一橋詠曹妙清

孝義菴詠湯秣錦

湖隄詠葉小鸞

湖上詠屠湘靈

梅花嶼詠馮小青

西湖詠柳依依

江上詠沈雲英

小蓬萊詠黃智生

西子湖詠何澹玉

西湖詠姚娟娟

涵青精舍詠綠天仙子

西湖詠柳慧珠

六橋詠吳蕊仙

段橋詠黃皆令

湖上詠朱桂英

鳳林詠徐若冰

南山詠孫秀姑

萬松嶺詠崔府君妻

西湖詠郎花仙

西泠仙詠卷三 目錄

孔雀園詠施曼仙

生香館詠李晨蘭

漪園詠辛瑟嬋

西溪詠雪君

珠潭詠滑蘭芳

懷仙閣詠陳蘭雲

妙香天室詠摩鉢

涵真閣詠心澈

西泠仙詠卷三

懷仙閣定本

圓嶠真逸著

山中詠越處女

杭州古越地猿公試劍或卽在湖上諸山處女卽元女劍仙之祖也

非有師承自得之術經天授始稱奇但看虹影浮蓮蕊已聽猿聲嘯竹枝貫斗芒寒飛練急處囊光斂刺鐘遲分明佳俠嬋娟子紅綾歸來夜月知

江上詠武陵娘子

楚有武陵娘子祠相傳范蠡女也一舸浮家應亦自南而北祠祀二千年不廢意者其有道術歟

西泠仙詠卷三

女仙

一

前生應是婉凌華一舸先浮去國槎劍術早應師越女舞衣終竟薄吳娃種蘭芳渚酬佳節采葛春山憶舊家合與瑤姬共祠廟武陵谿畔有桃花

妙庭觀詠董雙成

雙成爲西王母十六侍真之一妙庭觀在富春觀山雙成修道上昇處

雙成遺蹟舊金庭門外烟巒晚更青月底修簫秦弄玉波間鼓瑟楚湘靈夢回翠水應相識奏到雲璈或解聽如此仙山好樓閣商量只合住媼姪

江上詠樊雲翹

雲翹劉綱妻也鄞四明山爲雲翹所居故曰樊榭

夫婦皆有仙術綱官彭城與雲翹遊戲較術綱常
不勝唐太和中泛舟鄂渚秀才裴航遇之賦詩荅
航航至藍橋遂偕雲英仙眷焉貞元中於君山斬
白鼉救人無算嘗於駐鶴壇降乩稱君山神姑西
池度楫中有詩六首

雲英未必勝雲翹樊榭金庭隔綵橋仙侶荷鉏同采藥侍
兒捧硯正垂髫有婢曰裊烟彭城遊戲衙齋靜鄂渚烟波驛路
遙我誦金經思學道願隨鸞鶴上丹霄

葛嶺詠鮑姑

姑名潛光鮑元女葛洪妻洪所至移家曾居葛嶺
則錦陽雲菴當有鴻案鹿車遺蹟

西泠仙詠卷三 女仙

神仙眷屬屢移居葛嶺何人紀鮑姑石屋應畱家具在碧
奩曾照曉粧無金庭窗牖開樊榭甲帳樓臺話繡襦飛徧
羅浮綠胡蝶玉梅花下點春燕

稽畱峯詠許遠游妻

遠游好道遣妻孫氏還家爲書以謝絕之孫氏爲
書荅遠游曰昔梁生絕嶺孟光是攜蕭史登臺秦
女不舍衛人修義夫妻同行老萊逃名伉儷俱逝
豈非古人嘉遜之舉遠游不納見金蟬脫殼許邁
妻孫氏彥達之女秀之孫女旣離好無子歸宗見
真誥稽畱峯在靈隱邁隱處觀於孫氏之書詞意
兼美非深於道念者不能也

地仙容易署東華懸靄深山石徑斜何事竇滔棄蘇蕙虛
勞徐淑荅秦嘉繡襦甲帳自明月樊榭金庭空暮霞寂寞
稽畱峯下路風吹寒瀑謝蘿花

仙姥墩詠裴仙姥

姥餘杭人嫁西湖農家善採百花釀酒王方平嘗
就沽飲授藥一丸以償酒價姥服化去後有人經
洞庭見賣百花酒者即姥也見列仙傳東晉初裴
氏姥採衆花醞酒仙去見方輿勝覽墩在清波門
外舊傳基陞高數十尺故名墩也

提壺聲裏路三義重訪餘杭阿姥家欲就麻姑買滄海偶

邀仙客酌流霞一尊酌月金波湧雙髻穿雲柳浪斜我願

西冷仙詠卷三 女仙

西湖作春酒年年來醉碧桃花

江上詠嚴李侗

雲笈七籤載道教相承錄左元放授嚴光女李侗

嚴家少婦梅家女子陵婦梅福女也家世神仙女亦仙仙又傳仙

真慧業女還生女小嬋娟一肩荷鍤樵雲路雙髻簪花采

藥年七里桐江春水碧畫眉啼斷竹林烟

吳山詠孫寒華

吳人孫奚女也師杜契受元白之要顏容日少周
旋吳越諸山十餘年乃得仙道而去見墉城集仙
錄真誥云孫賁女於茆山得道冲舉因名其山曰
華姥山或云吳大帝女孫也

紫髯帝女字寒華華姥峯頭問舊家微子殷勤求服霧真
妃宛轉授餐霞赤烏碑圯埋青石朱烏窗深掩絳紗留得
閉房遺錄在碧城誰與論黃芽

杭州詠陶科斗許娥皇道育瓊輝

許穆一名謚字思亢邁之弟也婦陶科斗女弟娥
皇家有上清真經是魏夫人授弟子楊羲羲以傳
穆故全家奉道也孫黃民女道育瓊輝並得度世
詳見真誥黃民避亂奉經入剡復由剡至杭則科
斗諸人於武林有仙蹟矣

許掾全家道氣濃一編真誥易遷宮越中避地如梅福湖
上移居似葛洪四壁烟霞環枕簟幾房兒女話簾櫳他年

西泠仙詠卷三 女仙

四

化鶴歸華表儘喚曾孫識此翁

龍華寺詠傅大士妻

傅大士故漁人遇嵩頭陀指令臨水觀影見圓光
寶蓋便悟前因夫婦雙修頓通佛法龍華寺梁武
帝所立舊有傅大士像拍板門椎藕絲燈

應是西方善女人龍華會有前因修來烟水漁家傲散
罷天花佛國春菱鏡鴛鴦畱舊影藕絲龍象證微塵不須
更建雙飛寺寶蓋圓光各悟真

飛來峯禮隋神尼劉智仙舍利塔

智仙河東蒲阪劉氏女少出家有戒行隋文帝始
生於寺逆知爲帝代爲撫育皇妣來抱見兒成龍

形驚墮地智仙曰驚吾兒致令晚得天下帝長謂
之曰佛法暫廢賴汝而興屬周武廢教智仙隱帝
家卒後帝卽位令天下造佛舍利塔仁壽二年杭
州造塔於飛來峯發土得石函置舍利函不差分
寸人咸異之

神尼塔畔禮神尼象教興衰此導師幻出神通仙佛母撫
來襁褓帝王兒潛龍宮圮金瓶古靈鷲峯高石匣奇記向
飯猿臺下過夕陽花雨讀殘碑

江上詠謝自然

蜀女真謝自然泛海將詣蓬萊求師至一山遇一
道士言天台山司馬子微名在丹臺身居赤城真

西泠仙詠卷三

女仙

五

良師也乃回求受度白日上昇見雲笈七籤昌黎
詩誦爲童駭口孽哉

蜀道修真謝自然當年寒女此神仙終歸桐柏昇香地曾
上蓬萊採藥船白帝絲雲原縹緲金庭明月最嬋娟昌黎
誦道回心否雪擁藍關馬不前

江上詠焦靜真

女真焦靜真靈識精思至方丈遇二女仙謂曰子
欲爲真官可謁東華青童道君請其名字謂司馬
子微也見雲笈七籤唐劉禹錫有送焦鍊師似以
以宮人入道者當卽靜真也

東華宮闕禮真君更有蛾眉焦靜真天上一官應待汝山

中二女定何人可無服霧張微子或有餐霞安鬱嬪石室
丹臺終證果隨州詩格最清新

杭州詠夏山姑

杭州有黃三姑姑者窮理盡性時徑山有盛名常倦
應接訴於三姑姑曰皆自作也試取魚子來咬著
寧有許鬧事徑山心服或曰夏山姑見唐國史補
分明一語振宗風不證三摩證六通紫竹觀音原幻相黃
花般若是真空眾羅自賣龐靈照梵夾親書邵道冲會得
禪機魚子在青山如水月當中

靈隱詠顏待月

待月名初元瀟湘人母夢絳雪而生年十九白樂

西泠仙詠卷三 女仙

六

天納爲窈室聰慧能詩嘗偕春草二人至潯陽後
爲蠻素所譖失寵有病中感懷詩云月瘦花殘不
似前淚珠零落枕函邊可憐惟有金條脫臂上依
然伴妾眠後樂天召還京師以病不復隨寄居西
湖靈隱山女真菴會昌六年七月初九日忽語人
曰白尙書已爲海山院主先吾五日逝矣今來相
召吾當赴也端坐而化事見匡廬小志

夢中絳雪豔烟鬟青壁丹崖待玉顏修竹竟畱寒女住羣
花爭擁使君還雲龕對戶峯雙影雪澗當門水一灣如此
蛾眉尙遭如多情空說白香山

江上詠吳仁璧女

仁璧以不譏秦國太夫人墓銘爲武肅沉之江中
女年十八亦能詩精天文仁璧被繫女泣曰文星
失位大人其不免乎聞父死自沉於江見十國春
秋有閒居詩云爲惜苔錢妨換砌因憐山色旋開
尊仁璧仙去有人見女從父於羅浮見雅言雜載
沉湘往事最堪悲小海歌中玉一枝漢代緹縈原孝女楚
江擊絮是貞姬白蓮洲上嬌畱影新月沙頭澹掃眉合與
曹娥同廟食惜無過客解題碑

湖嶺詠黃靈微

花姑者女道士黃靈微也年八十而有少容自唐
初往來江浙湖嶺間名山靈洞無所不造至南嶽

西泠仙詠卷三

女仙

七

訪魏夫人壇葺而親之嘗爲野象拔箭齋輒銜蓮
藕以獻景雲中睿宗爲建洞靈觀開元中上昇有
仙蛾集壇上白鹿出入塚間明皇詔道士蔡偉編
入後仙傳顏真卿刺撫州以女道士黎瓊仙七人
居仙壇院書碑以紀其事見塘城集仙錄

靈蹤彷彿比麻姑尙有平原片石無野象銜花珠殿靜仙
蛾集樹石壇孤閉來丹室珍三寶禮罷黃庭颺五銖何處
湖干舊行蹟美人湖似玉娘湖

杭州詠王奉仙

當塗民家女也年十三四恒有女伴與之遊戲多
著靈蹟及長貌若天人智辨明悟江左之人謂之

觀音杜審權鎮金陵令狐綯鎮維揚延請供養高
士主父懷杲疑以爲邪就而問之話道累日爲所
折服後與二女弟俱入道居洞庭山光啟初遷餘
杭界居千頃山山下之人爲棣華宇以居之見墉
城集仙錄

何處香壇著棣華仙人家是美人家綠鬢侍女青綾帔白
髮門生絳帳紗牛渚煙深宵浣月馬塍雨過曉栽花藐姑
冰雪麻姑髻元蓋山前禮碧霞

水雲亭詠周瑤英

王迴字子高錢塘人嘗逢仙女周瑤英攜之游芙
蓉城作歌以記其事胡微之王子高芙蓉城傳瑤

西泠仙詠卷三

女仙

八

英偕子高過一嶺及門佳木清流殿閣金碧女流
道裝者百餘人遂登東廂之樓題曰碧雲一女郎
年可十五容色嬌媚曰此芳卿也明日王問其地
曰芙蓉城也水雲亭在錢塘尉廨子高故居也見
夢梁錄亦見東坡芙蓉城詩序

冥冥花國隔千盤一路芙蓉送羽翰閨苑書來應附鶴緜
山人去定驂鸞笙簫縹緲雲中聽樓閣空明月下看今日
真仙亭畔過煙波何處倚闌干

廣陵侯廟詠陸氏三女

宋真州兵馬都監陸圭攻方臘死難淳祐中潮圮
江岸神率三女揚旗空中浮石水面岸賴以成聞

於朝建廟封廣陵侯并封三女爲顯濟通濟永濟
夫人見游覽志三女一主護岸一主起水一主交
澤見錢塘遺事廟在江干石冢

翠羽名璫列畫裙金燈香樹薦蘭薰晚奩鏡展閒江月曉
閣環多擁海雲遠舶長瞻青鳥使靈旗應從碧霞君女貞
花發忠臣廟有客觀濤詠夕曛

此君堂詠西湖水仙

宋有邢鳳者字君瑞寓居西湖有堂曰此君水竹
幽雅一日獨坐見美人度竹而來吟詩曰娉婷少
女踏春陽無處春陽不斷腸舞袖弓彎渾忘却羅
衣虛度五秋霜鳳口占挑之曰意態精神畫亦難

西泠仙詠卷三

女仙

九

不知何事出仙壇此君堂上雲深處應與蕭郎駕
綵鸞女期以五年相會於鳳皇山下言訖不見後
五年邢隨兄鎮杭乃思前約具舟泛湖遙見美人
舉手招之曰妾西湖水仙也千里踐約君情厚矣
鳳喜躍過舟蕩入湖心人舟俱沒後人嘗見鳳與
採蓮女游蕩於清風明月之下見西湖志餘

小姑居處本無郎舞袖羅衣感斷腸儀鳳書生唐柳毅驂
鸞仙子杜蘭香松陰滿地靈壇遠菱唱橫波畫舫涼惆悵
雙投橋下水弓彎回首此君堂

皋亭山詠撒沙夫人

夫人皋亭山下倪氏女金兵至沈水死見夢韓蘄

王臨陣有神鴉蔽天鼓翼飛沙敵騎目迷而敗韓
表其異因加勅封建祠崇奉廟在皋亭山見湖堧

雜記

皋亭亭畔舊兒家白雁橫江噪晚鴉嘯夜悲懷同漆室沈
淵心事托懷沙宮嬪題壁憐隨月天女凌空解散花今日
青山有祠廟金燈香樹擁明霞

前洋街詠玉眞娘子

紹興中程迥居前洋街一日有物如燕自外飛入
乃一美婦長五六寸自言玉眞娘子迴就壁爲小
龕居之香火供奉頗言休咎期年飛去見睽車志
少鶯何處問前生瓔珞香龕有舊盟掌上輕盈趙飛燕花
前睨睨囀春鶯神君帳底中宵語妙子林間靜夜聲何事
經年便歸去驚鴻小影最傾城

酒肆詠烏衣女子

紹興間都下酒肆有道人攜烏衣椎髻女子買斗
酒獨飲女子歌詞以侑云朝元路朝元路同駕玉
華君千乘載花紅一色人間遙指是祥靈回望海
光新又歌云煙漠漠煙漠漠天澹一簾秋自洗玉
舟斟白醴月華微映是空舟歌罷海西流凡九闕
皆非人世語或記之以問一道人曰此赤城韓夫
人所製水府蔡眞君法駕導引曲也烏衣女子疑
龍云見林下詞選

偶畱仙蹟駐湖濱一曲新歌四座聞黃鶴酒香宜醉月青
虵劍氣欲凌雲珠宮貝闕紅霞帔霧鬢風鬟白練裘誰識
吳城小龍女捧花長侍玉晨君

映壁菴詠唐廣真

廣真嚴州人既嫁得血疾夢道人與藥服之而愈
因辭家入道至平江謁蓑衣何先生稱爲仙姑號
無思道人淳熙中夢呂純陽曹混成歆道僧偕渡
海游名山純陽令往元靜吳真人洞習書以有母
願畱形住世高宗召入德壽宮宣問符水靈驗書
寂靜先生四字賜之累封寂靜凝神真人三寶心
鑑云廣真好道虔奉何仙姑一日親授元妙有三

西泠仙詠卷三

女仙

十二

仙引至海邊跨大蝦蟇渡海隨游名山映壁菴在
鳳皇山南宋粧臺在焉下有洗粉池

符水靈徵感玉京曾邀天語署先生雲間問道何中立夢
裏游仙曹混成羽帔幾經三島去黃純頻向六宮行畱形
住世因慈母寂靜凝神自有名

梅莊詠武元照

元照蕭山民家女幼不茹葷夢神令其休糧因剖
腹滌胃受靈寶大洞法及混合真人印以符水濟
世二僕肩輿呵桃與食終日不飢錢塘陳氏女病
曠蘸禳不效元照至立愈爲張俊妾治腹疾服符
產巨蛇韓蘄王姪子辰深敬之延之家侍女夜窺

之見青雲起鼻端一碧色嬰兒盤旋腹上後歸蕭
然山端坐逝

蕭然山下舊人家絕似當年萼綠華呵氣曾聞咒桃實休
糧應不飯胡麻腹中毒蠱消丹篆鼻上香嬰燦碧霞聞道
梅莊畱舊蹟西湖佳處共看花

神仙宮詠魏無瑕

神仙宮在西溪宋御書額黃冠千指至端平間有
女真魏無瑕築室退居於此系以詩云年來青鳥
碧桃花築室安前卽是家玉貌星冠隨絳節雙成
不及魏無瑕見西湖百詠今惟菴名存焉安前西
溪地名

西冷仙詠卷三 女仙

三

萬橫香雪暮雲重笙鶴歸來弔落紅蕊榜才人林幼玉廬
山道士李騰空白鷗蘆葉涼煙外青鳥桃花澹月中應是
水仙祠宇近清溪一曲傍幽宮

煥彩樓詠孫不二

孫清靜馬丹陽室夫婦同事 呂祖弟子王重陽
修道成真爲北宗七真之一位不二元君岱陰有
清靜石室其修真處也嘉慶中降武林煥彩樓傳
西王母女大金丹爲女修正途金蓋弟子陳蘭雲
刻於吳門葆元堂

翠微深處禮元君修到元君更不羣遠與劉樊媿佳耦近
從葛鮑誦清芬東華玉笈多靈篆西姥丹經有祕文煥彩

樓頭親降筆青鸞長侍鬱金裙

梯雲樓詠徐元娘

正節先生應鑣女元師迫諸生北行從父兄投井
死

銀牀清冷照娥眉媿煞宮車北去時高妹殉親宜作志曹
娥死孝合題碑芳魂應返青鸞羽古水休牽玉虎絲好爲
湖山畱正氣一門忠孝禮叢祠

韓蘄王池詠徐君寶妻

徐君寶妻岳州人至元丙子伯顏偏師破岳州被
擄來杭居韓蘄王府前主者欲犯屢以計脫度終
不免乃題滿庭芳一闕於壁云漢上繁華江南人

西泠仙詠卷三

女仙

三

物尙遺宣政風流綠窗朱戶十里爛銀鈎一旦兵
戈舉旌旗擁百萬貔貅長驅入歌樓舞榭風捲落
花愁清平三百載典章文物掃地俱休幸此身未
北猶客南州破鏡徐郎何在空惆悵相見無由從
今後斷魂千里夜夜岳陽樓投池水死見輟耕錄
韓宅後爲景靈宮當在今錢塘門斑衣園梅岡園
當是別墅也

一池畢竟湛清流玉碎珠沈古渡頭烽火可憐驅北客湖
山猶幸對南州蝸涎墨澹煙窺暝鷗夢香銷月浸秋故國
招魂何處是斷雲千里岳陽樓

城西詠織登科記女子

夷堅志建炎春一士人步城西有虹自地出圓影
若水晶老木榼槎有茆舍機杼之聲女子四五縮
烏絲了髻玉肌雲質衣輕綃揜腕組織視之錦文
重花交葉之下有字數行首曰李易問之曰登科
記也

銀浦流虹抱月生蕊珠仙榜見分明支磯石畔窺眉黛及
第花間問姓名舉首偶然逢李易此中或者有梁清成都
卜肆今誰在我欲乘槎犯斗行

長春菴詠蔡冲靜

延祐間有姚真人者錢塘人妻蔡氏脫俗修真建
菴於洪福橋西相安巷曰長春姚亦建菴於妙心

西泠仙詠卷三

女仙

西

寺北曰長生夫妻皆證道妙人稱雙修見西湖游
覽志楊維楨趙孟頫聶大年皆有詩

流水溪橋浸紫霞瑤房晝靜轉丹砂別營桂隱金仙閣深
鎖蘭修玉女家滿甕曉雲烹雪茗一犁春雨種瓊花羣真
有約驂鸞去中夜歸來月未斜

紫陽菴詠王守素

丁野鶴妻也野鶴旣寂守素亦束髮爲女冠途中
拾小樹栽之曰我成道汝成林後二十年樹林成
守素化去卽山前成道樹也薩雁門有詩贈之

玉簫聲裏翠雲閒霧鬢風鬟隱翠巒種樹陰成山館靜掃
花人去洞門寒集靈臺上遲青鳥寫韻軒中問采鸞何處

蒼苔補衣石月華如雪滿瑤壇

南山弟一橋詠曹妙清

妙清字比玉號雪齋錢塘女士善鼓琴工詩三十
不嫁而風操可尙嘗持所著詩文偕乳媪訪楊鐵
崖於洞庭太湖間爲鼓琴歌詩以寫山川荒落之
悲引關雎雉朝琴操以和白雪之章鐵崖大賞敘
爲曹氏弦歌集見女世說和鐵崖西湖竹枝詞云
美人絕似董嬌嬈家在南山第一橋不肯隨人過
橋去月明夜夜自吹簫師事鐵崖鐵崖答以詩云
紅芽管蒂紫狸毫雪水初融玉帶袍寫得薛濤萱
草帖西湖紙價頓能高玉帶袍者曹之名硯萱草

西泠仙詠卷三

女仙

五

帖狀其孝也居在湖灣朱青湖擬於第一橋建明
月吹簫樓

何處南山第一橋湖波如鏡綠迢迢玲瓏白石依粧閣曲
折紅闌近畫橈花氣畱香春捧硯月明和影夜吹簫小姑
獨處真清絕不共蘇娘鬥舞腰

孝義菴詠湯秣錦

蓮池大師繼室湯氏後師祝髮名秣錦建孝義菴
爲女叢林主先一年化塔於雲棲寺外右山

虛庭花影悟優曇七筆勾中五蘊叅林外舊栽成道樹橋
邊新築出家菴蒲團香定風迴幔玉磬聲遲月滿函前世
應知善天女春山結伴禮雲龕

湖隄詠葉小鸞

小鸞名瓊章一字瑤期吳江人父紹袁母沈宛君
生三女長紉紉次蕙綢小鸞其季也幼慧工詩兼
善寫生宛君謂比梅花覺梅花太瘦比海棠覺海
棠少香年甫十七未婚而沒紹袁刻其遺詩名返
生香後相傳從天台泐大師受戒前生爲月府侍
書寒簧也有游西湖詩云隄邊飛絮起一望暮山
青畫楫笙歌去悠然水色冷
櫻湖照影曉波寒第一仙人葉小鸞略解春情嬌乳燕微
吹花氣靜芳蘭晚霞魚尾橫粧閣新月蛾眉起畫闌依舊
隄邊飛絮起招魂容易返生難

西泠仙詠卷三

女仙

去

湖上詠屠湘靈

湘靈名瑤瑟鄞縣屠長卿女士人黃振古妻能詩
卒年二十有七長卿子金樞娶沈君典女字七襄
亦能詩均早卒兩家彙刻其詩曰畱香草長卿故
好采真譚空覈元自詭出世有化女湘靈爲祥雲
洞侍香童子詩湘靈有湖上采蓮曲
疑采明珠淥水濱嬋娟前世本湘君花間照影雙鬟重柳
外迴波兩槩分結伴戲鷗牽翠袖避人褱鴨解羅裙六橋
東去三潭路西子湖頭日暮雲

梅花嶼詠馮小青

小青名元元容態妙麗通文翰解聲律精諸技家

廣陵年十六歸武林馮生千秋以同姓故諱之見
嫉正室徙居孤山別墅馮姻楊夫人憐之勸之歸
小青答書有云去則弱絮風中住則幽蘭霜裏蓋
志節素定矣卒以抑鬱病卒有焚餘草讀者憐之
見支如增小傳虞山蒙叟託河東君之言謂無其
人人多信之按張潮虞初新志所載小青有女弟
紫雲歸會稽馬髦伯姚靜增修游覽志載入西湖
路孤山相傳有小青廬支傳外有馮猶龍所作一
傳更詳虞山謬論不足破也余嘗謂女子有才爲
妾不得志以死者皆小青之類畱此零膏冷翠爲
天下後世傷心人寫照耳道光甲申爲修墓於孤
山建蘭因館並撰墓志賦詩紀事女士和者三十
餘人余家舊藏小青降乩詩刻本一卷

遠遂哀秋聽雨天綠陰西閣弔嬋娟桃花命薄難畱影紫
玉情深易化煙梨汁豈能消鬱結藕絲從此解纏絲傷心
紅粉知多少不似斯人最可憐

西湖詠柳依依

依依名靈和揚州人年十六歸方氏翁官浙東年
十八夫死守貞越三載揚州城破被擄不食七日
卒順治乙酉年也乾隆乙巳降乩海門不言休咎
云未來之事有未來之天主之言之太顯洩機招
譴言之太幽設渡藏舟且人生禍福履之自明縱

預燭前知亦毫不能趨避士君子惟當寡過以遠
咎強善以迎祥木筆沙盤不必多爲從事所言甚
精有降壇詩云歸去虛空踏月行冰綃衣重白雲
輕三秋曾飲銀河水吐向長江一色清並書舊詞
六闕如擬劇愁根反長愁枝葉澹月鋪窗亂寫飛
花影夜靜花枝嬌欲睡可憐人醒東風醉水底月
輪冰樣脆柳條敲著連波碎真仙才鬼才也乞傍
佛屋女祠建屋棲止道光乙酉吳人爲建祠山塘
清節堂側

玉潔蘭薰絕代才紅顏何處掩蒼苔潮平小海驂鸞去烟
暝重湖跨鶴來花影窗虛黃月上冰綃衣冷白雲迴蘇隄
萬樹嬋娟杳細雨東風遠夢哀

西泠仙詠卷三

女仙

六

江上詠沈雲英

雲英蕭山人道州守備沈志緒女流賊犯道州志
緒戰死雲英匹馬入賊陣奪父屍還詔以雲英爲
游擊將軍代領父衆會夫賈萬策戰死荆門雲英
辭官扶柩歸葬通春秋學設帳授徒卒葬龕山毛
西河爲撰墓志董恒巖作芝龕記樂府以雲英爲
樊雲英後身與秦良玉爲秦弄玉後身極意表章
雖小說家言然文武忠孝兒女英雄三生位業定
不從人間來

芝龕記裏兩娉婷天女華鬢玉女星荀灌早年曾救父宣

文老去尙橫經淒涼湘水和烟暝激盪江潮帶雨聽指點
海門青一角西河太史舊書銘

小蓬萊詠黃智生

智生名垓兒顧若璞孫女生而端麗能詩歌小令
性喜學佛病甚父母痛之女曰金鎗馬麥定業難
逃兒身痛耳心無所苦年十九卒見婦人集受同
邑陸文學鈞聘未婚病篤皈依於雲棲石上人大
殯若璞母弟也剃髮而逝若璞爲作往生紀實小
蓬萊在回峯黃氏別業也

天風吹過小蓬萊家有徐陵舊玉臺貝葉香中叅佛果曇
花影裏悟詩才隔湖空翠粧樓見捲幔閒雲病榻來馬麥

西泠仙詠卷三

女仙

九

金鎗皆定業此心安處不須哀

西子湖詠何澹玉

尤西堂春風舞歌弔何澹玉云余客江上交毘陵
莊芑燕言乚仙何澹玉武陵人才色雙麗亾年十
八有歌云春風舞春風舞吳姬紫玉飛作煙越豔
西施化爲土西堂賦詩弔之云君不見蘇娘家住
錢塘許犀簪唱徹黃金縷又不見青娘墓築孤山
墅春山血點紅顏簿風流宜與何娘伍三生一笑
相爾汝他年載酒賦招魂舉杯澆徧西陵浦所言
皆西泠則武陵者武林之誤也

情絲應不斷紅蠶瓔珞香櫺護碧龕紫玉成煙花十八冰

綃畱影月初三雙成環佩霓裳鞞六尺璣瑜翠袖憨惆悵
西堂新樂府蘭陵江上記靈譚

西湖詠姚娟娟

尤西堂木瀆仙姬傳云木瀆仙姬自稱慈雲侍者
降乩敘生平云武林人姚氏小字娟娟年十五爲
某太守妾雜置下陳中羣妾妬其能誣以他罪遂
罹害華山破雲仙師憐其冤死教以真訣遂召隸
仙籍令主木瀆爲水神降壇詩云經年憔悴到梅
花木瀆寒風石徑斜記得相思明月下烟蘊縹緲
認兒家有欲爲姬寫照者問其結束答云幅巾深
衣手拈竹枝蓋道裝也

西泠仙詠卷三

女仙

三

石徑荒寒掩綠苔靈蘭何處降乩來梨花月冷驂鸞去梅
蕊香深跨鶴回梵字聞呼雲縹緲仙粧看寫影徘徊采眞
更有春風舞玉碎珠沉一樣哀

涵青精舍詠綠天仙子

沈澗芳嘗與友人泛湖座有請乩者至書一絕云
才散笙歌罷六么冷風疎雨上輕舸問余名字眞
消息曾向王維雪裏描自云綠天仙子賈秋壑半
閒堂後植蕉百本乃其中得靈氣者現美人身書
於巾峯洞天翼日跡之果有巨蕉遂構精舍其側
卽今涵青精舍也見香祖筆記澗芳名蓀武林人
碧窗清晝弄依依畱迹仙壇舊夢非處子素心閒翠袖美

人秋影瘦羅衣盈盈珠露香生座寂寂瑤華月滿扉惆悵
空廊紅蝙蝠夜深猶繞畫檐飛

西湖詠柳慧珠

慧珠不知何許人嘉慶庚申齊梅麓在金陵與王
竹嶼陳秋麓輯乜壇詩數卷將付梓人請仙序之
慧珠降壇筆不停機文不加點空靈窈渺真合仙
才鬼才爲一手也序云春蠶縱死寧無未盡之絲
秋樹將枯尚有能鳴之葉况乎玉樓催促學士英
年金谷飄零佳人薄命恨絲絲其無已魂怳怳而
外淫無如碧落難通黃泉易隔遂使王郎佳句唱
徧秋墳屈子離騷咽殘湘水珠沈淵而有淚花落

西泠仙詠卷三

女仙

三

地以無聲千古寸心寂焉滅矣所以多情佛子發
無限慈悲好事神仙作絕大遊戲欲證盟於今古
爰撮合夫幽明返魂之香一燒補天之石重煉珠
璣錯落滿盤皆夢篆之沙錦綺續紛寸木卽生花
之筆於是花間月下酒半茶初偶有遐思遂成幽
契燕斜飛而似織月直入以無猜喚出真真書來
咄咄於是名流閨彥羽士高僧世有未名之人人
有未傳之作咸得畱姓名於身後寄心曲於人間
如是我聞得未曾有且夫菩薩出世月眼難知居
士談經塵耳不入故境緣虛而造實心以幻而生
誠我佛於時隨感而至蓮生舌底禪在指頭一喝

而三日耳聾半偈而萬緣心寂雞園密諦無非覺
路金繩驚嶺清辭摠是迷津寶筏神通廣大功德
無量弟子默齋聞諸語言皆大歡喜欲付剗劒以
公同人乞序辭不獲命慧珠章臺弱絮南國天枝
歌舞爲生煙花入劫誦白傳琵琶之什腸斷如絲
聆西湖鐘梵之音心枯似木趺坐馬纓樹下長齋
燕子樓中得遇慈航脫離苦海嗟乎蠅頭蝸角著
甚匆忙蟲臂鼠肝都非究竟落花爲美人小影芳
草乃斜陽斷魂若求無漏之因莫作有情之物觀
茲逝者能無憬然是用抽黃配白之詞以爲作佛
生天之證塵心未了毋登四大禪牀綺語紛來又

西泠仙詠卷三

女仙

三

是一重公案梅麓云味其詞意當是早上歌場飲
香白下晚耽禪悅終老西湖者潘榕皋云數百年
來閨閣中無此手筆豈卽河東君後身耶雖屬戲
言不爲無見也

前生應住有情天筆底香開座下蓮唱罷秋墳詩世界喚
回春夢佛因緣西湖鐘梵雲間月南國鶯花劫外煙證取
靈光叅慧業玉臺一序有人傳

六橋詠吳蕊仙

蕊仙名琪字佛眉長洲人挺菴方伯女孫工詩精
繪事有女中七子集行世蕊仙其一也蔡含師之
適管宇嘉宇嘉從洪承疇軍卒於官蕊仙以一女

子支離困頓於豺虎之交不作兒女態慕錢塘山
水之勝與才女周羽步爲六橋三竺之游羽步贈
詩云嶺上白雲朝入畫尊前紅燭夜譚兵紀實也
晤慧燈禪師爲故大夫若青公季女蕊仙洗心皈
命薙髮名上鑒自是不問人間事矣

瓊瑤珍闕麝蘭薰閨閣聲華重左芬女子有懷偏作客秀
才何事遠從軍香車禮佛青山雨紅燭談兵紫塞雲太息
辭家長入道黃繩身世換羅裙

段橋詠黃皆令

皆令名媛介嘉興人能詩善畫文學象山之妹適
楊世功元勛偕游江湖爲閨塾師初元功久客不

西泠仙詠卷三

女仙

三

歸張西銘求之父兄勸改適皆令不可卒歸元功
女兄名媛貞字皆德有臥雲齋詩集皆令有離隱
詩自序云古有朝隱市隱漁隱樵隱余殆以離索
之懷成其肥遯之志云梅村鴛湖閨詠爲皆令作
也陳迦陵婦人集云嘗見其儻居西泠段橋頭憑
一小閣賣詩畫自活稍給便不肯作有湖上草如
石閣漫草遺詩千餘篇自序有飢不食邪蒿之菜
倦不息惡木之陰蓋志節女子也施愚山爲作傳
天涯寒女此蛾眉來向西泠借一枝花落蘇隄閒鏡檻蘿
陰茆屋話機絲零脂斷粉湖邊閣賸水殘山畫裏詩閉跡
牆東署離隱年年春雨種將離

湖上詠朱桂英

田菽蘅閨閣窮元敘曰朱氏名桂英仁和人故陝西副使陳洪範室也清心契法銳意修真金錄標名有養誠道人之號琦章闡旨有閨閣窮元之書秘寶夙探於鴻濛元珠竟索於象罔許邁別婦先駕素麋裴靜降兒遠驂白鳳檢以瓊音之印信方外之寶書封以金英之函藏山中之石室升座演法將迎少女於華山蓮幘霓裳又送三清於金岳便欲發凌霄之想豈徒紀步虛之詞嗣有奇聞徵諸靈響云爾蓋女子之學道者

易遷宮裏舊媼姪莫誤湘靈與洛靈駕去素麋纔解角驂

西泠仙詠卷三

女仙

三

來白鳳愛梳翎百篇瓊笈長生錄一卷金璫玉女經閒向丹臺誦真誥琴心三疊在黃庭

鳳林詠徐若冰

名映玉崑山人適孔青崖沈大成女弟子也著有南樓吟稿從良人僑居西泠鳳林春秋佳日煙篷雨櫂延緣游覽生時母夢寒梅一枝生平愛梅沒之日庭梅盡落臨沒說偈云來從梅花來去向蓮花去去來本無心無相亦無住

前生應是玉梅花小字分明萼綠華孤嶼煙霞聽唳鶴隔溪香雪散啼鴉絳紗問字詩人宅翠袖聯吟處士家一夜江城吹鈿篋空枝畱得影橫斜

南山詠孫秀姑

秀姑小家女幼卽童養於姑及長顏色殊麗鄰有惡少曰閻四虎豔秀姑色秀姑浴四虎登屋窺之秀姑怒詈四虎以穢語汙秀姑秀姑訴之姑姑訴之鄰畏四虎強橫不敢較秀姑乃紉衣裙飲溲死貧無以斂忽異香發越盈數里會達官過聞香異之廉得狀立置四虎重典祭秀姑葬之南山立綽楔表墓並請旌焉

烈女貞姬似爾無姓名畱重美人湖冰心如月輝茆屋玉骨生香被廣衢春晚墓門翔語燕夜深華表上啼烏拂衣來讀韓陵石紅葉彫霜碧蘚枯

西泠仙詠卷三

女仙

三

萬松嶺詠崔府君妻

嘉慶中有崔姓夫婦因貧同縊萬松嶺松樹上錢塘令卽於縊處葬之頗著靈異土人立廟祀之蓋婦之正氣所徵也余及門方稚韋孝廉撰文紀之何來節士偕貞婦此地從容畢此生明月照心兼照影青山埋骨不埋名斷魂化鶴家千里枯樹啼烏夜五更解向叢祠勒佳傳方干才筆最縱橫

西湖詠郎花仙

花仙杭州人工詩許字某氏未嫁而卒歿有靈徵若吳江葉小鸞也

七修著錄舊名家如此仙姿合字花未見子登婚北燭曾

聞寶懿署西華甄兄借筆貽彤管鮑妹畱銘護碧紗絕似
返生香一縷芳魂何處碧天霞

孔雀園詠施曼仙

錢塘人幼秉靈質善治閨閣錮疾對坐竟日默視
患處頗見神效若秘閣閒談所載張仙姑者所至
偕其祖母同行姻黨中稱曰神仙姑娘

梨頰桃鬟豔曉霞雲英仙藥沁芳芽蕊淵夢醒邀明月
敘抄成對落花終見真靈歸北燭虛傳寶懿署西華觀香
小妹曾親見孔雀園前第幾家

生香館詠李晨蘭

晨蘭名佩金長洲人滄雲府丞孫女虎觀司馬女

西泠仙詠卷三

女仙

三

山陰何公子仙帆室玉潔蘭薰閨房之秀有生香
館詩詞集余爲作序以秋雁詩得名稱秋雁詩人
在都門與梁溪楊蕊淵女史齊名蕊淵若上元夫
人晨蘭則九華玉真安靈簫也歿於武林其昆弟
於琴河設乩牒請臨壇云已歸玉局不復至矣

春山凝黛葬羅裙賸有蘅蕪散夕曛銀漢無聲遲織女玉
波何處弔湘君畫闌紅溼深宵雨小閣寒停薄暮雲我是
嬋娟舊書記遺編珍重護靈芸

余有蕊蘭
書記小印

漪園詠辛瑟嬋

瑟嬋名絲太原人遺世獨立渺焉寡儔肌膚若冰
雪比之藐姑射仙人殆梅花之精也博覽工詩選

列朝詩品以余爲 國朝第一曾以從官之甌閩
道出武林小住西湖余女弟子二十餘人茲爲翹
楚嘗夢偕廬山女仙李騰空謝余因來問字沒後
降妙香壇云騰空度入詠真洞天證以前夢當於
文女黎仙外增靈跡矣

此才真合織回文一曲湘靈奏夜分芳渚靜臨新婦石畫
樓寒倚美人雲梅林花謝香沾袖茶鳴煙深翠掃裙明月
吹簫涼似水西湖高格最憐君

西溪詠雪君

卽縮雲樓主人寒香瘦玉萼綠華後身也歿後降
林蘭館仙壇言已爲西溪水仙管領梅花三萬樹

西泠仙詠卷三

女仙

三

屬爲建祠余因賦西溪水仙詞秣陵玉春波錢塘
顧西梅均爲畫像

萬梅花裏拜叢祠手折寒香供一枝鄴下感甄還作賦湘
中弔屈獨陳詞暝煙斂袂春歸晚疎影窺粧月到遲會乞
烏絲鐫白石瓊姬墓上更題碑

珠潭詠滑蘭芳

瘦鶴少府女年十四未嫁而夭跌坐合掌白氣滿
室作妙蓮花香殆有夙根者

吹簫芳氣麗娟年日午槐陰解簸錢嬌勝綺羅花戚里慧
叅香雪佛因緣煙霞靜玩三生石水月閒栽九品蓮應是
垂髻小龍女乘風歸去四禪天

懷仙閣詠陳蘭雲

蘭雲名羲越籍吳產余族妹也適長山袁司馬袁
閔世姻司馬嘗延小艮師至袁浦問道君竊聞緒
論一意修真四十七日而元關開幼未讀書因定
生慧經典無不通曉兼受西竺心宗解鐵確祭煉
方伯某公女遇祟巫醫不效君至應手而除因於
瑤潭贊化宮建葆元堂也於龍門為第十二輩派
名陽萊金蓋女真向未入派入派自君始前身為
太虛玉女胡剛剛也中年以後益修性功以無極
而太極一語為主於佛道兩家直提宗旨於儒則
守大學在明明德在止於至善二語可謂三教同

源者矣

西泠仙詠卷三

女三

三

知是靈蘭是妙蓮幾番譚道更譚禪太虛玉女前身是竺
國金仙密諦傳樊榭樓臺自清靜魏壇弟子總嬋娟君女弟二
十餘人多宗盟恩誼人間少一瓣心香禮月圓太白女弟名月圓

妙香天室詠摩鉢

余次室管筠字靜初生平處事多士君子行深有
造於余家詳見先後事略初耽禪悅閱釋藏注心
經淺說自蘭雲來敘宗盟之誼與君相契謂君性
功不可及因以命功授君即君之居心行事以為
性功之助兄事之若無著天親也余抱西河之戚
境益困終歲奔走君為余奉老母事病嫡撫孤孫

主家政一以真誠自言未嘗學問處事別無他法
惟以理字起頭中字立脚定中有得因自名守性
頻年歲歉人災立願爲衆生禮懺不爲一身一家
也樵雲子臨駐鶴壇謂與余前生同爲玉局掌籍
太虛命名心貞 道姥臨雲淨示余云有我弟子
摩鉢尊者爲汝持家可無內顧謂君也受大黃經
錄先爲散花素女後爲輔真元女龍門派名陽純
靈簫墨會話前塵月地雲階見此人天上真靈交以烝仙
家夫婦敬如賓瑤壇受錄今生果玉局修書夙世因他日
青冥兩黃鶴蓬萊宮闕記歸真

涵真閣詠心澈

西泠仙詠卷三

女仙

三

余子裴之婦汪端字允莊又字小韞錢塘處士天
潛先生季女婉淑賢孝博學工詩選明詩三十家
去取精當能正牧齋歸愚之失有自然好學齋詩
自蘭雲敘宗盟之誼摩鉢禮雲淨之壇自知前生
爲高青邱先生弟子悲先生生前屈抑發心誦大
洞玉章經十萬八千卷於贊化宮具疏上叩而先
生降示位證九天洪濟明德真圓道念益堅師事
蘭雲母呼摩鉢懺悔文字焚其所著元明逸史數
十卷閉關動輒數月壇名心澈派名來涵龍門第
十三輩也所居曰涵真閣受錄授北斗中天宮侍
香靈女同校先天秘書事法名心和近精星命之學

原是青邱弟子行
身前身後事蒼茫
能將智慧通三教
更以精誠格九閭
靈苑朝真宵禮斗
鬢宮謁聖曉焚香
他生願証盟威品
龍虎山高易夕陽

西泠仙詠卷三

女仙

三

女真寶訓

西王母語漢武帝云夫欲修身先營其氣太仙真經所謂行益易之道益者益精易者易形能益能易名上仙籍不益不易不離死厄行益易者謂常思靈寶也靈者神也寶者精也子但愛精握固閉氣吞液氣化爲血血化爲精精化爲神神化爲液液化爲骨行之不倦神精充溢爲之一年易氣二年易血三年易精四年易脉五年易髓六年易骨七年易筋八年易髮九年易形形易則變化變化則成道成道則爲仙人吐納六氣口中甘香欲食靈芝存得其味微息揖吞從心所適氣者水也無所不成至柔之物通致神精矣此元始天王在丹房中所說微言今敕侍笈玉

西泠仙詠卷三

女真寶訓

一

女李慶孫錄以相付

上元夫人語漢武帝云汝胎性暴胎性淫胎性奢胎性酷胎性賊五者恒舍於榮衛之中五臟之內暴則使氣奔而攻神是故神擾而氣竭淫則使精漏而神疲是故精竭而魂消奢則使真離而魄穢是故命逝而靈失酷則使喪仁而自攻是故失仁而眼亂賊則使心鬥而口乾是故內戰而外絕此五事者皆是截身之刀鋸剗命之斧斤矣

雲華夫人語禹曰性發乎天而命成乎人立之者天行之者道道存則有道去則非無物不可存也非修不可致也天參玄空地參混黃人參道德去此之外非道也哉天保其空地守其物人養其氣所以全也我命在我非天地

殺之鬼神害之失道而自逝也

萼綠華語羊權曰修道之士視錦繡如弊帛視爵位如過客視金玉如礫石無思無慮無事無爲行人所不能行學人所不能學勤人所不能勤得人所不能得人行嗜欲我行介獨人行俗務我學恬澹世人勤聲利我勤內行世人得老死我得長生又氣穴圖中口訣云水銀實在葫蘆裏固閉其口置深水

太玄女顓和曰人之處世一失不可復生非修道不可延生也

王妙想述虞舜語曰大道在內不在外在身不在他人玄經所謂修之於身其德乃真古有言曰修道如初得道有

西冷仙詠卷三

女真寶訓

二

餘多是初勤終惰前功併棄也

盱母外混世俗而內修真要

魯妙典云人之上壽不過百二十年哀樂日以相害况女子之身豈可埋沒貞性混於凡俗乎 麓床道士以黃庭經授之曰此經召集身中諸神澄正神氣神氣正則外邪不能干諸神集則怖畏不能及若形全神集心正氣清則澈見千里之外纖毫無隱矣所患人不能知知之而不能修修之而不能精精之而不能久中道而喪自棄前功不惟有玄科之責亦將流蕩生死苦報無窮也

跋

郭景純始剋游仙之名曹堯賓因廣游仙之體後世論詩以太白爲仙才人抱仙骨詩雜仙心非獨男子爲然女子亦指不勝屈流觀載籍若配瑛萼綠華安鬱嬪樊雲翹其所賦詩飄飄有凌雲之氣不從人間來我夫子頤道先生於西泠懷仙百詠之外復詠女仙得六十人可謂烟霞宗伯花月主人矣如滿壺曉雲烹雪茗一犁春雨種瓊花梅林花謝香沾袖茶鴨煙深翠掃裙則仙心之閑寂也如雲龕對戶峯雙影雪礪當門水一灣種樹陰成山館靜掃花人去洞門寒則仙居之幽靜也白蓮洲上嬌畱影新月沙頭澹掃眉處子素心閑翠袖美人秋影瘦羅衣則仙子之

西泠仙詠卷三

跋

綽約也如荀灌早年曾救父宣文老去尙橫經高妹殉親宜作志曹娥死孝合題碑則仙姝之貞節也如微子殷勤求服霧真妃宛轉授餐霞越中避地如梅福湖上移居似葛洪則仙侶之同心也如駕去素麋纔解角驂來白鳳愛梳翎野象啣花珠殿靜仙蛾集樹石壇孤則仙苑之莊嚴也如一尊酌酒金波湧雙髻穿雲柳浪斜一肩荷鍤樵雲路雙髻簪花採藥年則仙蹤之疎遠也如白鷗蘆葉涼煙外青鳥桃花澹月中月明小海驂鸞去煙暝重湖跨鶴來則仙游之靈異也野鶴道人謂君已證聲聞乘他日養真館開左仙賓雲右仙賓霞五百華鬢仙人一齊合掌來聽說法知維摩丈室有人來散天花也

碧城舊侍性尼來淨敬跋於覺華菴

西泠仙詠卷三 跋